

IZVJEŠTAJ, ZAKLJUČCI I PORUKE 5. MEĐUNARODNOG SIMPOZIJA

U vremenu od 20-21.04.2017.godine, održan je 5.međunarodni Simpozij na temu: „**Reformski procesi u BiH –poslovni ambijent i porezno okruženje-stanje i perspektive**“.

Kao osnova za raspravu, pripremljen je Zbornik radova, koji sadrži 44 referata, naučne i stručne radove, od autora iz: BiH, Hrvatske, Srbije, Crne Gore . Referati su iz oblasti: finansija, računovodstva, revizije, informacionih tehnologija, elektronskog biznisa, kulture organizacije poslovanja, menadžerskih vještina, poduzetništva, strategije ulaska u EU, i ustrojstva zdrave državne politike.

U nastavku dajemo zaključke u 12 tačaka:

01. Reformisanje bh. stvarnosti dugo traje i ne nazire se zatvaranje ciklusa. Trgovanje sa svijetom implicira unutarnju integraciju države, tj. stvaranje jedinstvenog ekonomskog prostora, ugodnog za profitni biznis. Financijski učinci su temelj i suština ekonomsko-socijalnog razvoja. Sistem se mora uporedo graditi, reformisati i usklađivati sa utjecajima iz globalnog okruženja.

02. Računovodstvena logika zaokupljena je dilemom: kako urazumiti državu da se počne brinuti o ekonomskom i socijalnom napretku BiH, ili jasnije, da se ritam proizvodnje i potrošnje uskladi na principima bilansiranja koristi i žrtava. Nikada država nije bila dobar privrednik. Vrijeme je pokazalo da nije ni dobar upravljač, niti je razuman distributer resursa. Jedino je prekomjerni potrošač.

03. Temeljna odrednica računovodstvenog upravljanja i u privatnom i u javnom sektoru je vještina usmjeravanja poslovne aktivnosti prema profitnim ciljevima. Upravljački mehanizam je u rukama menadžmenta i državnog upravljačkog vrha/vladinih resora. Poslovna filozofija državnih resora je vještina upravljanja reverzibilnim i ireverzibilnim strujanjima između:

- privredne i finansijske politike,
- državnog i pravnog uređenja,
- fiskalne i socijalne politike,
- obrazovanja i nauke,
- tehničkog i tehnološkog progresu,
- poduzetničke infastrukture,
- zaštite okoliša,
- korištenja raspoloživih resursa,
- zaštite javne imovine od prelijevanja u privatnu imovinu bez kupovine,ect.

04. Računovodstvena pismenost i poslovna kultura služe adekvatnom servisiranju probirljivog tržišta, koje apsorbira proizvode i usluge standardnog kvaliteta i prihvatljivih cijena. Poslovna kultura u koju je utkana računovodstvena pismenost je način razmišljanja,

djelovanja i ponašanja svih sudionika, koji kreiraju i osiguravaju privredni razvoj i socijalni napredak nacionalne ekonomije. Za djelotvorno upravljanje potreban je talenat, iskustvo i neprekidno učenje radi sticanja znanja koje se može unovčiti.

05. Danas se u svim zemljama svijeta, razvijenim i manje razvijenim, izučava tržišna ekonomija, uokvirena u principe, kriterije, načela i standarde poslovnosti, ali se ograničeno i nepošteno računovodstveno elaborira, a ponegdje i zloupotrebljava. Glad za zaradom je potisnula moralne postulate kulture poslovanja.

Stvarnost je paradoks nedoličnog i dvoličnog poslovnog morala. Kodeksi profesionalnog ponašanja ukrašavaju uredske vitrine direktora i vladinih dužnosnika, i pokriva ih prašina. Računovodstveno znanje i finansijsko izvještavanje nisu efikasno zaštitno sredstvo preduzetne i državne imovine.

06. Računovodstvena i finansijska profesija ponovo se našla u sendviču, između čekića i nakovnja. Menadžment zahtijeva od računovođa da prave našminkane obračune, ugodne za izbjegavanje obaveza prema javnim prihodima, a etičke norme obavezuju računovođe da se pridržavaju propisa i MRS-ova. Računovođa je u profesionalnoj opasnosti, između sile i haribde... Ako ne poslušna direktora, ostatak će bez posla, a ako ga poslušna, stićiće na sud i izgubiti licencu.

07. Državne korporacije, koje posluju u javnom sektoru, odlikuju se skupim menadžmentom i visoko plaćenom upravom, koja nije dorasla za racionalno upravljanje, ali je sposobna za neracionalno trošenje.

Ured za reviziju FBiH stalno upozorava : potrošeno je nezakonito toliko i toliko milijardi društvenog novca... Efekti su poražavajući: gomilaju se gubitci i potraživanja uposlenika, raste nezaposlenost, povećava se broj blokiranih računa i stečajeva, raste siromaštvo. Paradoks je u tome što se nezakonitost samo konstatira, a vinovnici ne vraćaju ono što su prigrabili.

08. Posebice je problematično kreiranje fiktivne i neistinite dokumentacije koja ulazi u računovodstvo, i sliva se u statistiku na bazi koje se planira budućnost. U takvim privrednim društvima nema mjesta za poštene računovodstvene stručnjake, koji se pridržavaju kodeksa profesionalne etike. Poduzetništvo koje svoj profit zasniva na friziranim bilansima, i utajama prihoda koji pripadaju državnoj blagajni, neće nas uvesti u EU.

09. Nikakav futurolog ne može predvidjeti kad će se dogoditi priključenje, i da li će EU živjeti toliko dugo vremena, koliko je potrebno da se odgovori na nekoliko hiljada pitanja iz Agende.

10. Kako svijet raste po obimu i kompleksnosti, postaje sve teže asimilirati promjene i koristiti ih racionalno . Računovodstveno-finansijski djelatnici će stoički izdržati sve plime i osjeke iz okruženja, i svoju profesionalnu energiju usmjeriti na plemenite ciljeve ljudskog blagostanja.

11. Struku i nauku neće obeshrabriti goraka istina da poruke sa naših pet simpozija nisu proizvele ni najmanji učinak na kreatore i upravljače zadužene i plaćene da se brinu o stabilnosti ekonomsko-socijalne budućnosti BiH.

12. Nije jednostavno liječenje društveno-ekonomskog sistema ... Najsigurniji iscjelitelj je vrijeme , koje će ukloniti one koji svjesno prelaze preko svoje savjesti.

Programski odbor:
Emeritus Prof. dr. Jozo Sović